

聖門志卷之三上

鹽邑志林第五十八帙

黃國樊維城彙編

海鹽

呂元善纂輯

姚士麟

胡震亨訂閱

男呂兆祥參考

四氏封典

姓譜世紀
顯齋附

叙曰自戰國魏安厘王封孔子後為魯國文信

君後累朝封號不一宋仁宗至和二年始封為

衍聖公哲宗元符元年又改封奉聖公徽宗崇

寧三年復封為衍聖公

國朝洪武元年 詔封衍聖公世襲鑄降銀印十
年設襲封府衙門每遇萬壽聖節赴京 朝賀
又奉

旨准額設官屬人等 且從衍聖公保舉堪用人數
具呈都省以憑鈐用景泰三年 詔顏氏宗子

世襲五經博士嘉靖十八年 欽授曾子後世
襲五經博士弘治 十六年題 准子思子奉祀

書院博士世以衍 公次子承襲正德元年設
衢州府世襲五經 博士景泰三年欽授孟子後

士襲五經博士每 歲萬壽博士赴京慶賀萬曆
四十二年奏討博士印奉 旨下部候給洪武

元年 詔世襲曲阜知縣管理邑務惟選賢能
者授職不以世次 承襲著為令甲宣德元年三

氏學錄始以聖裔 任尼山洙泗書院前代各設
山長奉侍香火正 德二年奏 准改山長職銜

為學錄嗟夫運命 雅移陵谷遷改皇王之胤或
夷為編氓名謚無 稽而四氏之後高爵厚祿安

富尊榮與天地相為悠久余因摭撫國史參考
家乘論次而傳列之令纂服者庶幾盛美有彰

而誦法者不患文獻無徵矣今以四氏之姓譜

世紀及

國朝之世官歷代之科目貢監聞達俱備錄焉

世襲職銜

聖公府孔氏襲封衍聖公一人翰林院顏氏世襲
五經博士一人曾氏世襲五經博士一人孔氏世
襲五經博士二人孟氏世襲五經博士一人孔氏
世職曲阜縣知縣一人四氏學學錄一人尼山書
院學錄一人洙泗書院學錄一人孔庭族長一人
林廟舉事一人

孔氏姓譜

先師孔子黃帝之後也黃帝生玄囂玄囂生嶠極
嶠極生帝嚳帝嚳生契唐堯之臣佐禹治水有功
始封於商賜姓子是爲子姓之祖契生昭明昭明
生相土相土生昌若昌若生曹圉曹圉生冥冥生
振振生微微生報丁報丁生報乙報乙生報丙報
丙生主壬主壬生主癸主癸生天乙是爲成湯革
夏而有天下天乙生太丁太丁生太甲太甲生太
庚太庚生太戊太戊生河亶甲河亶甲生祖乙祖
乙生祖辛祖辛生祖丁祖丁生小乙小乙生武丁

武丁生祖甲祖甲生庚丁庚丁生武乙武乙生太
丁太丁生帝乙當周武王克商時封帝乙之子微
子啟國於宋以奉湯祀啟卒傳弟思衍號曰微仲
微仲生宋公稽宋公稽生丁公申丁公申生潘公
熙潘公熙生弗父何遜國於弟厲公何世爲宋卿
厲公何生宋父周宋父周生世父勝世父勝生正
考父三命益共又得商頌于周太師歸以祀其先
王正考父生孔父嘉五世親盡別爲公族始以孔
爲氏焉孔父嘉生木金父木金父生畢夷畢夷生
防叔避華督之難奔魯防叔生伯夏伯夏生叔梁

紇仕爲陬大夫初娶魯施氏有九女而無子其妾
生孟皮字伯尼有足疾不任祀事乃求婚于顏氏
顏氏有三女其父問曰陬大夫父祖爲卿士實先
聖王之裔今其人身長十尺武力絕倫吾其貧之
雖年高性嚴不足爲疑三子孰能爲之妻二子莫
對其幼微在進曰從父所制將何問焉曰卽爾

能矣遂以妻之顏氏禱于尼丘之山升之谷草木
之葉皆上起降之谷草木之葉皆下垂及懷妊十
一月而生先聖于周靈王二十一年庚戌十月二
十一庚子日甲申時卽今之八月二十七日是夕

有二龍繞室五老降庭五老者五星之精也顏氏之房聞鈞天之樂空中有聲云天感生聖子故降以和樂之音生而首上巧頂因名丘字仲尼有異質其眉一十二彩目六十四理立如鳳峙坐如龍蹲手握天文足履度字望之如什就之如升視若營四海躬履謙讓胸有文曰制作定世符身長九尺六寸腰大十圍享年七十三歲薨于周敬王四十二年壬戌四月乙丑日即今之二月十八日至國朝萬曆四十一年癸丑凡二千九十有六年也

宗子世紀

二代孔鯉字伯魚生于周景王十三年己巳適魯昭公以二鯉魚賜孔子榮君之况因以名其子早聞過庭之訓既長魯哀公以幣召稱疾不行年五十歲卒于周敬王三十七年戊午生子伋三代孔伋字子思卒年六十有二生子白詳具四配列傳不重書

四代孔白字子上請所習于子思子思曰先人有訓焉學必由聖所以致其才也礪必由砥所以致其刃也故夫子之教必始于詩書而終於禮樂雜記不與焉齊威王召曰爲國相卒年四十

有九生子求

五代孔求字子家楚召不受卒年四十五生子箕

六代孔箕字子京爲魏相年四十六卒生子穿

七代孔穿字子高楚魏趙三相交聘不就著儒家

之語十二篇名曰讎言年五十一卒生子謙

八代孔謙字子順仕魏爲安釐王相改嬖寵之官

以事賢奪無任之祿以賜有功諸喪職秩者不

悅相魏九月以病致仕遂寢于家嘗曰今秦有

吞天下之心不出二十年天下其盡爲秦乎秦

莊襄王召不行魏以孔子後封魯國文信君年

五十七卒生子三鮒騰樹

以上俱一子相承惟至九世始有三子焉

九代孔鮒字子魚秦始皇召爲魯國文通君拜少

傅三十四年丞相李斯始議焚書與弟騰藏其

家語論語尚書孝經等於祖堂舊壁中自隱于

嵩山教弟子百餘人後陳涉爲楚王聘爲太傅

凡仕六月託病而退年五十七卒於陳下著書

二十餘篇名曰孔叢子生子隨字元路六傳至

安嗣絕鮒弟騰字子襄身長九尺六寸漢高帝

過魯封爲奉嗣君以奉孔子祀後爲惠帝博士

遷長沙太守年五十七卒生子忠

按封孔子後裔奉祀始此

聖門志 卷之三十一
十代孔忠字子貞徵爲博士封褒城侯年五十七
卒生子二長武次安國

十一代孔武字子威爲漢文帝博士至臨淮太守
早世卒生子延年

十二代孔延年博覽群書漢武帝時爲博士轉少
傅遷大將軍年七十一卒生子霸

十三代孔霸字次儒幼有竒才漢昭帝時爲博士
宣帝時以大中大夫授皇太子經遷詹事爲高
密相元帝卽位拜太師賜爵關內侯食邑八百
戶號褒城君給事中賜黃金二百斤宅一區徙

名數于長安爲人謙退嘗稱位祿太過何德以
堪之帝欲致之相位讓至三四帝知其誠乃止
上書求奉先聖祭詔令以所食邑祀孔子享年
七十二卒于第帝素服臨弔者再至賜東園秘
器錢帛策贈列侯謚曰烈生子四福捷喜光
十四代孔福襲封關內侯年六十三卒生子房
十五代孔房漢哀帝時襲封關內侯食邑八百戶
生子均

十六代孔均字長平初名莽避王莽改今名敦篤
好學有大才襲封關內侯徵拜尚書郎言辭清

辨奏對成章漢平帝元始元年改封褒成侯食邑二千戶五年王莽篡位拜太尉不就三辭疾乃得還年八十一卒生子志

按自漢以來雖以聖裔寵異之猶未襲封也至十三代霸封關內侯傳十四代福十五代房俱嗣侯雖襲封矣猶稱關內侯是為尊帝師而封也至平帝始改封均為褒成侯則專為奉先聖而封矣自是封爵世世不絕

十七代孔志漢光武初拜大司馬建武十四年襲

封褒成侯食邑二千戶卒謚元成生子損

十八代孔損字君益漢明帝永平十五年襲封褒

成侯章帝元和二年東巡狩詔褒成侯助祭和

帝永元四年改封褒亭侯食邑一千戶生子曜

十九代孔曜字君曜襲封褒亭侯生子二完讚

二十代孔完襲封褒亭侯早卒嗣絕以弟讚之子

羨襲封

二十一代孔羨字子餘魏文帝黃初元年拜議郎

改封宗聖侯以魯縣百戶奉祀生子震

二十二代孔震字伯起晉文帝泰始三年改封奉

聖亭侯拜太常卿黃門侍郎食邑二千戶年七

十五卒生子嶷

二十三代孔嶷字功成襲封奉聖亭侯食邑二千

戶年五十七卒生子撫

二十四代孔撫舉孝廉辟太尉掾襲封奉聖亭侯
爲豫章太守食邑一千戶生子懿

二十五代孔懿襲封奉聖亭侯從事中郎食邑一
千戶年六十一卒生子鮮

二十六代孔鮮字鮮之恢廓大度好學善誨宋文
帝元嘉十九年襲封奉聖亭侯改封崇聖侯生
子乘

二十七代孔乘字敬山後魏舉孝廉文帝延興三
年封崇聖大夫食邑五百戶生子靈珍

二十八代孔靈珍授祕書郎孝文帝太和十九年
仍封崇聖侯食邑一千戶生子文泰

二十九代孔文泰襲封崇聖侯食邑一千戶年五
十八卒生子渠

三十代孔渠襲封崇聖侯北齊天保元年改封恭
聖侯後周大象二年改封鄒國公食邑一千戶
生子長孫

三十一代孔長孫周武帝宣政元年襲封鄒國公
食邑一千戶年六十四卒生子二英慙嗣慙

三十二代孔英慙陳光大元年改封奉聖侯嗣絕
弟嗣慙隋文帝初應制登斗 注州司兵參軍

遷太子通事舍人襲封鄆國公煬帝大業四年
改封紹聖侯食邑一千戶十二年授吳郡主簿
帝崩揚州由是歸魯年七十卒生子德倫

三十三代孔德倫唐高祖武德九年改封褒聖侯
太宗貞觀十一年詔朝會位同三品食邑一千
戶天授元年賜勅書及時服年七十七卒生子

崇基

按此後世詔孔氏
子孫朝會之始

三十四代孔崇基唐中宗嗣聖十二年襲封褒聖
侯神龍九年制授朝散大夫陪祭朝會年五十
六卒生子遂之

三十五代孔遂之字藏暉唐玄宗開元五年襲封
褒聖侯特授四門博士郡王府文學蔡州長史
二十七年改封文宣公除兗州長史遷都水使
者食邑一千戶生子萱

三十六代孔萱襲封文宣公兼兗州泗水令生子
齊卿

三十七代孔齊卿唐德宗建中三年襲封文宣公
兼除兗州功曹參軍生子惟睦

三十八代孔惟睦憲宗元和十三年授兗州參軍
襲封文宣公年六十五卒生子策

三十九代孔策明經及第少府監主簿國子監丞襲封文宣公遷國子尚書博士年五十七卒生子振

四十代孔振字國文唐懿宗咸通四年狀元及第除秘書省校書郎歷運判監察御史左補闕水部員外郎襲封文宣公年七十四卒生子昭儉四十一代孔昭儉任南陵尉授廣文館博士兗州司馬除秘書郎襲封文宣公累宰曲阜年六十卒生子光嗣

四十二代孔光嗣齋郎出身哀帝天祐二年授泗水令陵廟主五季之亂失其世爵故授是官年四十二爲洒掃戶孔末所害生子仁玉

四十三代孔仁玉字溫如初孔末旣害光嗣自爲曲阜令時仁玉生始九月母張氏抱歸育於外家後魯人見其長訴於官事聞於朝乃罷末以仁玉爲先聖嗣身長七尺姿貌異常善六藝尤精春秋爲人嚴整臨事有斷時年十九歲任曲阜縣主簿兩考滿陞縣令襲封文宣公後周太祖廣順二年幸謁祖廟及孔林召對數刻賜五品服銀器雜綵復口授曲阜縣令兼監察御史

年四十五卒於官葬祖塋東贈兵部尚書生子

四宜憲冕勗

後世以孔氏苗裔幾絕而復續稱為中興祖

四十四代孔宜字不疑自幼聰悟十歲能屬文宋

乾德四年詣闕上書述其家世詔為曲阜主簿

調黃州軍事推官時方平吳越叅預兵機宣力

寔多代歸太宗召見遷司農寺丞領關市於星

子鎮時江左始平庶務不綱星子實江湖之會

要貨殖之都聚度其利害請營之為軍朝議以

戶口少且陞為縣即命宰之政成考績有稱轉

運使王明奏其言忠行篤守法奉公乞擢居朝

列委以事權尋入覲因獻所著文賦太宗嘉焉

顧問孔氏歷世之數具以實對太宗謂左右曰

家世之遠有如此者乎特遷太子右贊善大夫

襲封文宣公未幾通判高密還朝遷殿中丞雍

熙二年太宗北征受詔督軍餉溺巨馬河卒年

四十六生子三延世延澤延渥

四十五代孔延世字茂先以父沒邊境特賜同學

寃出身授曲阜主簿秩滿陞福州閩縣令調許

州長葛令宋真宗即位宣諭侍臣令咨訪宣聖

有何子孫呂端奏有嫡孫延世見任長葛令召

見詢以家門故事授曲阜令襲封文宣公卒於
官年三十八生子聖佑

四十六代孔聖佑年九歲賜同學究出身祥符元
年真宗東封詔賜衣綠次京官陪位駕幸林廟
授太常寺奉禮郎四年轉大理評事天禧五年
以光祿寺丞襲封文宣公知仙源縣事遷贊善
大夫終於太子中舍卒年三十五嗣絕堂弟宗
愿字子莊延澤子宋仁宗天聖中以叔父道輔
廕補太廟齋郎寶元二年授守國子監主簿襲
封文宣公知仙源縣事至和二年改封衍聖公

知仙源縣如故累遷尚書比部員外郎通判維

州卒於官年六十二子四若蒙若虛若愚若拙

四十七代孔若蒙字公明宋神宗熙寧元年襲封

衍聖公哲宗元祐元年改封奉聖公坐事廢爵

生子二長端友次端操弟若虛字公實宋哲宗

元符元年代兄襲封奉聖公卒朝廷復以若蒙

長子端友嗣爵

詔令衍聖公專主祀事不任他
職每遇大禮許赴闕陪位至

國朝

列聖視學必遣官取衍聖公三氏子孫觀禮始此

四十八代孔端友字子交宋徽宗崇寧三年襲封

衍聖公管勾祀事宜和三年特轉通直郎除直

秘閣賜緋仍許就任關陞建炎四年偕族叔傳
嫡姪玠扈從高宗南渡寓居衢州紹興二年權
遣知邠州卒於任無子以姪玠嗣按孔氏分南北宗自此始
弟端操以兄南渡留守祖庭金初權襲封衍聖
公生子四瑄璠璣玠

四十九代孔璠字文老金天春三年嗣封衍聖公
管勾祀事贈榮祿大夫皇統二年卒年三十八
生子二長拯次摠

五十代孔拯字元濟年七歲金熙宗皇統二年除
文林郎襲封衍聖公管勾祀事終通直郎世宗

大定元年卒年二十六嗣絕弟摠字元會大定
三年繼兄襲封衍聖公管勾祀事二十一年世
宗召赴闕下欲留任用力辭專奉祀事特授曲
阜縣令襲封之後嚴潔祭祀敦睦親族嘗言曰
生爲聖人子孫而繆嘗嗣職坐觀隘陋寧不愧
於心乎乃親率佃戶之東蒙山採伐材木增廣
林廟及尼山防山殿堂廊廡五十餘楹終奉直
大夫卒年五十有三贈光祿大夫生子二長元
措次元紘初摠年四十得子多不育夜夢異人衣冠偉然告曰今此非爾子後癸丑
年庚月丁日所生者則真爾子矣當名元措後果如其言

五十一代孔元措字夢得年十一歲金章宗明昌
二年文林郎襲封衍聖公管勾祀事三年特旨
令視四品其散官係八品不稱仰超授中議大
夫以後襲封並准此例承安二年勅令衍聖公
年及十七兼曲阜縣令仍許世襲不得別行差
占世襲曲阜
縣令始此貞祐二年宣宗幸汴京趨赴行在
所適丁母憂遙授東平府判三年起復與隨朝
職事遂授太常博士興定二年秩滿復任四年
改行太常丞元光元年授同知集賢院兼前職
四年秩滿復任天興元年八月通歷二考遙授

泰定軍節度使兗州管内觀察使兼行太常少
卿二年遷光祿大夫尋改太常卿癸巳年元陷
汴梁特取元措還東平依舊襲封衍聖公主奉
祀事無子以姪孫湏嗣爵湏之因子元紘孫也
後湏坐罪奪爵嗣絕以元措從弟元用權襲封
焉元用字 卿初貞祐二年元措從宣宗遷於
汴擬元用攝祀事及宋克平山東寶慶元年授
通直郎權襲封衍聖公仙源令二年改濟州通
判兼京東西道安撫司主管機宜文字元太師
木華里統諸道兵至承制拜授襲封衍聖公世

襲曲阜令給降衍聖公印生子之全按孔氏家譜若愚生
端立端之生琥琥生拂拂生子二
長元孝元元月元孝生子之厚

五十二代孔之厚贈亞中大夫濟寧路總管輕車
都尉魯郡侯生子浣從弟之全字工升乙酉年
父元用從征益都之全遂權襲封衍聖公曲阜
令癸巳年元措自汴還東平依舊襲封衍聖公
之全止充曲阜令壬子年二月宣差東平路行
軍萬戶總管權授襲封衍聖公降到印信兼曲
阜縣令年五十一卒生子三治澄濟

五十三代孔澄字日新贈通議大夫禮部尚書上

輕車都尉魯郡侯生子思晦弟治字世安之

全長子壬子年代父充曲阜長官中統元

年改曲阜令四年權主祀事至元十三年授承

事郎曲阜尹兼管諸軍興魯仍權祀事二十二

年授奉訓大夫單州防二十九年遷奉直

大夫密州知州元貞元年赴闕朝見特授中議

大夫襲封衍聖公生子思誠罷封改封姪思晦

五十四代孔思晦字明道天資穎秀元武宗至大

中舉孝廉授范陽教諭改寧陽教諭仁宗卽位

訪問孔子之後儒臣元明善等曰思晦嫡長應

嗣時延祐三年六月遂授上議大夫襲封衍聖

公給月俸自百緡加至五百緡給四品印泰定

四年進封嘉議大夫至順二年改鑄三品銀印

卒年六十七贈通奉大夫河南江北等處行中

書省叅知政事追封魯郡公謚文肅生子克堅

五十五代孔克堅字璟夫性聰學博善詩詞尤工

樂府順帝至元六年授嘉議大夫襲封衍聖公

至正八年朝廷謂公爵世冊授中奉大

夫易以銀章十五年徵為同知太常禮儀院事

攝太常卿遂拜治書侍御史辭歸追拜山東廉

訪使受詔復辭歸會山東亂北行抵藁城丞相

賀太平奏召入為集賢直學士十九年遷禮部

尚書是年冬擢為西臺侍御史二十二年除國

子祭酒謝病歸守祖庭二十六年

天兵取中原我

太祖高皇帝手詔趨入 覲待以賓禮而不名賜

廩祿不煩以政郊社必致膳肉慰勞甚至

上嘗謂曰爾有福快活人也政不煩爾洪武三年

以疾告遣中使存問日再至疾篤 詔驛傳還

家賜白金百兩雜絲十端是歲三月行次邳之

新安驛卒於舟中諸子扶柩歸葬祖墓西北年
五十有五生子九希學希說希範希進希麟希
鳳希順希尹希贊

按孔氏分九門自此始

五十六代孔希學字士行年二十一元順宗至正

五年授中奉大夫襲封衍聖公歲戊申我

太祖高皇帝初革元命希學首朝京師

上清問下民卽以歷代治理條對甚悉上嘉之賜

雜綵六端命回守祖庭洪武九年十二月授資

善大夫襲封衍聖公卒年四十有七 朝廷遣

使諭祭生子二長訥次誥

自後每代皆遣使諭祭不重書

五十七代孔訥字言伯洪武十六年丁父憂以國

哀赴京將俾襲爵以居喪乃止十七年正月朝

京師二月二日拜襲封之命初行誥詞吏部奏

用資善階

聖上諭之曰旣爵公勿事散官但誥以織文玉軸

爲異耳遂爲故事每歲入 覲得給符乘傳班

序列文臣首厚其廩餼下及僕從皆古未有也

三十三年九月十六日以疾卒年四十有三生

子四公鑑公鐸公鈞公鏗

五十八代孔公鑑字昭文洪武三十三年襲封衍

聖門志 卷之三十一
聖公三十五年四月初五日以疾卒年二十三
生子彥縉

五十九代孔彥縉字朝紳其名與字皆

仁宗皇帝所命也三歲而孤甫十歲入京永樂八
年十二月拜襲封之命至二十二年八月十五
仁宗卽位率三氏子孫朝賀遣內官金英傳

旨衍聖公來朝與正一品衣服一套鈔二十貫下
程羊酒永依此例又賜第於東安門北景泰二
年上幸太學詔率三氏子孫觀禮賜冠帶
錦衣越三年朝會復賜三臺銀印玉帶衣織金

麒麟文一硯一品皆異數卒年五十有五命禮

部治喪工部治墳葬祖墓之左生子四承慶承

吉承澤承源

六十代孔承慶六歲遭母喪盡孝既長從三代學
錄族祖克晏學所著有禮庭吟稿行世未襲爵
而卒景泰六年贈襲封衍聖公生子弘緒弘泰

六十一代孔弘緒字以敬景泰六年十二月十三
日襲封時年八歲延入內宮特賜金鈕麒麟圖
書御篆謹禮崇德四字亦異數也成化六年坐
事廢以弟弘泰嗣爵生子二長聞韶次聞禮弟

弘泰字以和以姪聞韶尚在襁褓不任祀事成
化六年五月十一日繼兄襲封生子聞詩

六十二代孔聞韶字知德弘治十六年襲封生子
二長貞幹次貞寧

六十三代孔貞幹字用濟嘉靖二十五年襲封生
子尚賢

六十四代孔尚賢字象之嘉靖三十五年八月襲
封生子二長胤椿次胤桂

六十五代孔胤椿字懋齡舊例應襲封者未襲封
之先儒巾圓領送三氏學讀書習禮萬曆二十

二年胤椿以父尚賢比照勳衛具題

欽依冠帶此特典也

顏氏姓譜

復聖顏子黃帝之後也黃帝生昌意昌意生帝高
陽帝高陽生稱稱生卷章卷章生吳回吳回生陸
終陸終生第五子曰晏安爲曹姓歷唐虞夏商不
能紀其傳周武王克商封其裔曹俠爲邾子俠生
非非生成成生車輔車輔生將新將新生訾父訾
父生夷甫字伯顏謚武公夷甫生子友別封郕爲
小邾子因以父字爲氏始以顏爲姓焉爲魯附庸
故世世事魯爲卿大夫魯國之族最爲蕃衍友生
爽爲下大夫爽生連爲上大夫連生噉爲上大夫

噉生鳴爲上大夫鳴生音爲司寇音生羽爲下大夫羽生訓爲下大夫訓生簡爲下大夫簡生箱爲下大夫箱生廌爲司寇廌生景爲司寇景生整爲司寇整生恤爲司寇恤生求爲司寇求生友爲邑宰友生無繇字路爲魯卿士少孔子六歲孔子始教於闕里而受學焉娶齊姜氏生回於周景王二十四年庚辰冬十一月辛巳朔十六日丙申卽魯昭公二十一年少孔子三十歲娶宋戴氏生子歆卒於周敬王三十年辛亥秋八月乙未朔二十三日丁巳葬魯城東防山之陽

宗子世紀

二代顏歆字子林魯大夫葬復聖墓東十餘步元泰定三年從祀生子儉

三代顏儉魯大夫元泰定三年從祀生子威

四代顏威魯下大夫生子芘

五代顏芘魯下大夫生子億

六代顏億魯下大夫生子岵

七代顏岵魯下大夫生子卸

八代顏卸字伯佃秦大夫生子譽

九代顏譽秦舍人生子產

十代顏產項羽聞其名聘之不受生子異

十一代顏異字世仁漢大夫生子愚

十二代顏愚漢卿士生子達

十三代顏達漢大夫生子稹

十四代顏稹字季達漢武帝時為尚書郎會稽都

尉生子衷

十五代顏衷郡功曹從事鞏令生子凱

十六代顏凱字季卿張禹薦於朝為安成太守生

子邃

十七代顏邃字景深郡上計吏生子龠

十八代顏龠字茂宗州舉茂才生子綽

十九代顏綽字參道為太守生子準

二十代顏準始仕為從事復高尚不仕生子阮

二十一代顏阮字懷珍舉有道為著作郎生子亮

二十二代顏亮字世明為郡督郵生子敷

二十三代顏敷字士榮州舉茂才桓帝時為御史

大夫生子二長斐次盛

二十四代顏斐京兆尹有善政生子二長魯次歡

俱無嗣弟盛字叔臺漢尚書郎魏歷青徐二州

刺史關內侯始自魯國徙居瑯琊臨沂代傳孝

聖門志 卷之三十一
恭因號其居爲孝弟里葬臨沂縣西七里今屬費縣生子欽

二十五代顏欽字公若明詩禮易尚書多所通說
晉歷東平郎將司馬大中大夫東莞廣陵太守
給事中引直禁省封葛繹縣子生子默

二十六代顏默字靜伯汝陰太守護軍將軍給事
中襲葛繹縣子生子三畿輦舍長次俱無後

二十七代顏含字弘都少有操行以孝弟聞本州
辟不就晉元帝初鎮下邳命爲參軍過江以爲
上虞令轉王國郎中丞相東閣祭酒出爲東陽

太守東宮初建含以儒素篤行補太子中庶子
黃門侍郎歷散騎常侍大司農豫討蘇峻功封
西平縣侯拜侍中尋除國子祭酒加散騎常侍
遷光祿勳以年老遜位成帝美其素行就加右
光祿大夫致仕二十餘年年九十三卒遺命素
棺薄斂謚曰靖生子三髦謙約

二十八代顏髦字君道儀狀嚴整風貌端美桓公
見而嘆曰顏侍中廊廟之望也歷太尉西陽王
散騎將軍尚書都官郎中國大中正給事黃門
侍郎父老不就襲爵西平縣侯加給事中晉陵

臨川太守侍中本州大中正加秩中二千石光祿勳生子三緜綸暢

二十九代顏緜字文和州西散騎都尉西平縣侯生子靖之

三十代顏靖之字茂宗西中郎行參軍宣城太守司徒諮議御史中丞生子騰之

三十一代顏騰之字弘道善草隸書有風格歷州西曹主簿度支校尉治書御史巴陵太守生子五長興之次炳之

三十二代顏興之安寧太守生子登弟炳之字叔豹以能書稱歷韓國江夏王參軍奉朝請員外散騎常侍生子見遠

三十三代顏登字康之梁鄱陽王府郎中令嗣絕從弟見遠字見遠歷安城王侍郎征西參軍治書御史兼中丞正色立朝有當官之稱及梁武帝執政乃以疾辭齊和帝暴崩見遠慟哭而絕武帝恨之謂朝臣曰我自應天順人何預天下人事而顏見遠乃至於此當世嘉其忠生子協

三十四代顏協字子和博涉羣書工於草隸飛白以父蹈義忤時絕意仕進梁元帝爲湘東王引

聖門志 卷之三
協爲記室叅軍撰晉仙傳五篇日月災異圖二
卷文集二十卷梁元帝後著懷舊志及詩稱贊
其美生子四長之儀季之

三十五代顏之儀字子升三歲能讀孝經及長博
涉羣書好爲詞賦嘗獻神州頌辭致雅贍梁元
帝手勅褒之江陵平隨遷長安周高祖初建儲
宮盛選師傅以之儀爲侍郎卽拜小宮尹封平
陽縣男宣帝卽位遷上儀同大將軍御正中
夫進爵爲公卒年六十九有文集十卷行於世
生子二長冠次昶俱無後季弟之推字子介年

十二值湘東王繹自講莊老便預門徒虛談非
其所好還習禮傳博覽羣書無不該洽詞情典
麗甚爲西府所稱繹以爲常侍叅軍梁元帝立
以爲散騎侍郎後爲周軍所破值河水暴長具
船將妻子奔齊顯祖見而悅之卽除奉朝請引
於內館中侍從左右尋遷通直散騎常侍俄領
中書舍人尋除黃門侍郎齊亡入周爲御史上
士隋開皇中召爲學士甚見禮重尋以疾終有
文三十卷撰家訓二十篇並行於世生子思魯
三十六代顏思魯字孔歸博學善屬文尤工訓詁

歷北齊衛府參軍隋校書郎唐武德初拜秦王
府記室參軍生子四長籀次相時勤禮育德皆
歷顯官相時爲禮部侍郎勤禮爲虢州刺史生
子昭甫爲汝南太守生子二長元孫爲豪州刺
史次惟貞爲太子文學元孫生子二長春卿爲
偃師丞次杲卿爲常山太守惟貞生子七次子
允南爲正議大夫第六子真卿爲太子太師第
七子允臧爲太子中允

二十七代顏籀字師古其先本居琅琊世仕江左
及之推歷事周齊齊臧始居關中師古少傳家

業博覽羣書尤精訓詁屬文隋仁壽中授安

陽尉尋坐事免歸長安十年不得調家貧以教

授爲業及高祖起義師從父思魯至長春宮謁

見授朝散大夫從平京城拜燉煌公府文學再

遷中書舍人專掌機密于時軍國多務凡有制

誥皆成其手太宗踐祚拜中書侍郎封瑯琊

縣男後坐事免太宗以經籍去聖久遠令師古

於秘書省考定五經師古多所釐正諸儒重加

詳議莫不嘆服頒行天下令學者誦習尋拜秘

書少監奉詔撰定五禮禮成進爵爲子復命註

聖門志 卷之三十一
班固漢書解釋詳明深爲學者所重有詔編之
秘閣俄遷秘書監弘文館學士十九年從駕東
巡道病卒年六十五謚曰戴有集六十卷其所
著漢書及急就章行於世生子趨庭

三十八代顏趨庭字茂實文皇帝挽郎朝散大夫
職方郎吉州刺史生子尚須

三十九代顏尚賓右率府親衛鄜州司功監州錄
事下邳令生子鼎

四十代顏鼎生子迢

四十一代顏迢生子贊

四十二代顏贊生子旻

四十三代顏旻生子五長君則無嗣次君佐君雅

四十四代顏君佐金鄉丞生子文威弟君雅生子

二長文蘊次文鐸

四十五代顏文威生子承從弟文鐸贈太常平

原郡節度副使生子衍

四十六代顏承祐生子二長崇德無嗣次仲昌從

弟衍字祖德梁龍德中擢第解褐授北海主簿

以治行聞歷臨濟鄒平令晉祖時拜殿中俄遷

都官員外郎充河陽三城節度副使因父疾棄

官晉祖復召爲工部郎中樞密直學士連使促
召至闕踰年上表請還侍養授青州行營司馬
丁父憂哀毀甚俄召爲駕部郎中鹽鐵判官以
母老懇辭有詔止守本官未幾復出爲天平軍
節度副使開運末授左諫議大夫權判河南府
召拜御史中丞復抗表求侍養詔書褒許卽與
其母東歸周廣順初起爲尚書右丞俄克端明
殿學士太祖征兗州以術權知州事歸朝權知
開封顯德初上表求解官授工部尚書放歸鄉
里卒年七十四生子櫟

四十七代顏仲昌淳化二年講五經賜第仕終南
京判官以曾孫岐任執政贈太子少保生子太
初從弟權父任爲巡官生子端

四十八代顏太初字醇之少博學有雋才慷慨好
義喜爲詩多譏切時事文宣公孔聖祐卒無子
除襲封且十年太初致書叅知政事蔡齊齊爲
言於上遂以聖祐弟襲封登進士授臨晉主簿
後移應天府戶曹叅軍南京國子監說書生子
三長復次公弼熙寧二年進士萃縣令隨登進
士三原縣丞從弟端祥符元年帝行幸曲阜以

堯國公後特授郊社齋郎終桂陽司理生子繼
四十九代顏復字長道嘉祐中詔郡國敦訪遺逸
京東以復言凡試於中書二十有一人考官歐
陽修奏復第一賜進士爲校書郎知永寧熙寧
中爲國子直講元祐初召爲太常博士遷禮部
員外郎兼崇正殿說書進起居舍人兼侍講拜
中書舍人兼國子監祭酒未踰年以疾改天章
閣待制卒年五十七生子六嶢岐嶠嶠嶠岐
字夷仲官至門下侍郎資政殿學士正奉大夫
魯郡侯自嶢以下子孫建炎四年俱扈從高宗

南渡從弟繼登進士世居陋巷故宅生子昌

五十代顏昌生子擊

五十一代顏擊生子价

五十二代顏价生子順

五十三代顏順生子寶

五十四代顏寶生子椿

五十五代顏椿中書生子之美

五十六代顏之美字宗德天成縣教諭益都路學

正廬州路教授東明縣尹生子池

五十七代顏池字德裕山陽縣主簿宣德府教授

國朝洪武十五年以三代學教授主奉祀事生于
二長拳次幹

五十八代顏拳字克膺主奉祀事年五十七卒生
子希仁

五十九代顏希仁字士元正統十一年 欽定主
奉祀事卒年六十一生子三議讚諭族弟希惠
景泰二年行取復聖公子孫特授翰林院五經
博士後以不係嫡派奉 旨黜罷

六十代顏議字定伯因正統以後宗系紊亂天順
壬午辨正仍授翰林院五經博士俾世襲主奉
祀事成化元年乙酉

憲宗視學勅禮官行取陪祀

上御文華殿面賜冠帶宮錦襲衣宴於禮部於時
朝賀未有宅第議入奏可之賜第於東安門外
入觀馳驛定爲常例卒年七十六生子三公鉉
公銅公鉞

六十一代顏公鉉字宗器成化戊戌世襲前職卒
年八十生子五重德重禮重道重賢重式

六十二代顏重德字尚本正德壬申世襲前職卒
年五十九生子從祖

六十三代顏從祖字守嗣嘉靖九年世襲前職卒
年四十二無後從弟肇先子啟源嘉靖四十一
年世襲前職生子嗣慎

六十四代顏嗣慎字用修萬曆六年世襲前職卒
年六十生子三胤宗胤祚胤祿

六十五代顏胤宗字養蒙未襲職卒生子二長伯
貞次伯廉弟胤祚字永錫萬曆十七年代襲前

職及元子伯貞長讓職致仕

六十六代顏伯貞字叔節萬曆二十七年世襲前
職卒弟伯廉字叔清以兄卒子幼不任祀事萬

曆三十

年代襲前職

曾氏姓譜

宗聖曾子夏禹之後也禹山水有功受舜禪而有天下生子啟啟生仲康仲小生帝相帝相生少康少康生次子曲烈始封國於鄫子爵歷夏商周世次無考曾僖公十有四年卽周襄王六年也鄫始見於春秋魯襄公六年邾人滅鄫鄫世子巫奔魯去邑而爲曾氏子孫始以曾爲姓焉三桓家臣曾天曾昇其後也巫凡數傳生黜字子皙黜生參於周敬王十五年丙申冬卽魯定公五年也少孔子四十六歲年十六孔在楚父命之楚受學

聖門志 卷之三
焉資質篤實力學純固故於聖人之道獨得其宗
生子三長元次申華俱從祀萊蕪侯廟庭

宗子世紀

二代曾元從祀萊蕪侯廟庭生子西

三代曾西生子欽

四代曾欽生子導

五代曾導生子羨

六代曾羨生子遐

七代曾遐生子二長偉次盈漢東陽太守

八代曾偉漢尚書令生子樂

九代曾樂漢山陰縣都鄉侯生子浼

十代曾浼生子二長旃次光光後爲長沙房

十一代曾旃生子嘉

十二代曾嘉生子二長寶次頊家扶風生子二長

玉家冀州後爲冀州房次昌家青州後爲青州

房

十三代曾寶漢武威太守車騎侍郎生子琰

十四代曾琰生子據

十五代曾據西漢末避王莽之亂挈族南遷散居

江西南豐廬陵諸郡生子二長闡次瑒徙處州

十六代曾闡生子植

十七代曾植生子耀

十八代曾耀諫議大夫生子培

十九代曾培生子德

二十代曾德生子珣

二十一代曾珣生子渙

二十二代曾渙景陽侯生子梓

二十三代曾梓生子勰

二十四代曾勰鎮南軍司馬生子端

二十五代曾端生子二長鉉次道始梁車騎大將

軍開國侯遷交州

二十六代曾鉉生子海

二十七代曾海生子二長橫次琦黃門侍郎

二十八代曾橫生子興

二十九代曾興生子隆

三十代曾隆生子鈞

三十一代曾鈞生子謀

三十二代曾謀生子丞

三十三代曾丞生子三長珪次舊徙雲蓋次畧徙

撫州樂安是為南豐曾氏

三十四代曾珪生子寬

三十五代曾寬生子莊

三十六代曾莊唐侍御史江州都押衙生子慶

三十七代曾慶唐御史大夫生子二長偉次駢生

子耀

三十八代曾偉御史大夫吉州都押衙生子輝吳

散騎常侍鎮南節度銀青光祿大夫國子祭酒

兼御史中丞上柱國傳十五世孫榮登永樂甲

申狀元弟鼎中永樂辛卯江西解元壬辰進士

三十九代曾耀拜真州刺史生子崇範

四十四代曾崇範家居竈薪不屬讀書自若家藏九

經子史南唐郡侯賈匡皓薦爲太子洗馬東宮

使生子延膺

四十一代曾延膺廕授部驛使兼資庫使太宗陞

左班殿直泉州兵馬都監澄修吉州團練生子

五碩頰頊頤頤咸平五年登第官至筠州錄

參顏咸平五年與兄頊同第官至循州團練判

官

四十二代曾碩淳化三年登第黃州從事南雄州

軍事判官榮州觀察判官朝奉郎大理丞生子

承昌

四十三代曾承昌生子萬敵

四十四代曾萬敵生子公整

四十五代曾公整生子九思

四十六代曾九思生子文傑

四十七代曾文傑生子好古

四十八代曾好古生子尚忠

四十九代曾尚忠生子敬父

五十代曾敬父生子元德

五十一代曾元德生子价翁

五十二代曾价翁生子汝霖

五十三代曾汝霖生子崇文

五十四代曾崇文生子利賓

五十五代曾利賓生子輔志

五十六代曾輔志生子德胄

五十七代曾德胄生子奮用

五十八代曾奮用生子質粹

五十九代曾質粹生長於江西志安府永豐縣

國朝嘉靖十二年四月詹事府掌府事吏部左侍

郎兼翰林院學士顧鼎臣奏稱堯舜禹湯文武

聖門志 卷之三十一
周公之道傳至孔子而大明孔子傳之曾子曾子傳之子思子思傳之孟子今顏孟子孫皆世襲博士而曾子之後獨不得沾一命之榮豈非古今之闕典也哉乞 准照弘治間顏孟二氏事例訪求曾氏子孫相應者一人授以翰林院五經博士世世承襲奉

世宗肅皇帝聖旨以曾子孔門大賢不可無後禮部咨行江西撫按官督同布按二司保勘質粹起送回籍徙居山東兗州府嘉祥縣以衣巾奉祀曾子祠墓至嘉靖十八年二月初八日奉

聖旨准比照顏孟二氏例授翰林院五經博士仍與世襲嘉靖三十九年卒生子昊

六十一代曾昊未襲職卒生子繼祖

六十一代曾繼祖字繩之少病日兼以父祖連喪遷延未得請襲時有江西曾袞以應貢到京見有可乘之機具本奏下禮部先被叅格不行後歷教官陞湖廣攸縣知縣以贓敗官遂挾囊金大肆營求輒得朦朧襲職繼祖具奏奉

聖旨禮部知道該吏科等科都給事中劉不息等山東等道掌道事湖廣道御史劉光國等叅勘

得嘉靖十二年間江西提學副使徐階面審曾
嵩與弟曾衮俱稱生長南方不願北徙載在江
西布政司回咨咨呈司府查得惟曾質粹欣然
請行乃得結勘起送到部以衣巾奉祀數年始
得蒙

聖上特恩授以世官是曾子千數百年以來無後
而有後自質粹始也曾子之後千數百年以來
無官而有官亦自質粹始也承祧已定事奚可
疑又查得吏科給事中李盛春原論曾衮不可
襲爵五議乞行勘寃改正仍歸曾質粹之後將

曾衮削奪官爵命回原籍於是繼祖得仍舊主
奉祀事生子承業

六十二代曾承業字洪福萬曆五年八月二十三
日世襲前職

孔氏北宗世襲翰林院五經博士一人

述聖子思子書院在兗州府鄒縣南門外舊名中庸精舍相傳卽孟丁受業處也

國朝弘治十六年題 准以衍聖公次子世襲翰林院五經博士奉子思子書院祀事每歲春秋上祭博士赴鄒縣主祭

博士題名

孔聞詩字知言六十二代係衍聖公弘泰長子以父代兄襲封弘治十六年恩廕前職

孔聞禮字知節六十二代係衍聖公弘緒次子正

德元年世襲前職

孔貞寧字致用六十三代係衍聖公聞韶次子嘉

靖二十五年世襲前職

孔胤桂六十五代係衍聖公尚賢次子萬曆二十

二年世襲前職

孔氏南宗世襲翰林五經博士一人

先師四十八代孫孔端友乃宋神宗熙寧元年襲

封衍聖公若蒙之長子也字子文哲宗元祐元年

除朝奉郎徽宗崇寧三年襲封衍聖公建炎四年

偕族叔孔傳嫡侄孔玠扈從高宗南渡寓居浙江

衢州府西安縣遂家焉紹興二年權遣知邠州卒

於任無子以任玠嗣玠字錫老金初襲封衍聖公端操第

四子紹興二年授承事郎襲封衍聖公六年詔權

以衢州學為孔氏家廟賜祭田專主奉廟祀事生子

四長楷字季紳紹興二十四年襲封衍聖公生子文遠

文遠字紹先熙寧四年襲封衍聖公生子二長萬春

字耆年宋襲封衍聖公生子名洙洙字景清宋襲封衍

聖公元世祖至元十九年奉旨召赴闕辭爵授國

子祭酒提舉浙東道學校事卒年六十無子自端

友至洙襲封凡六世正嗣絕始罷封焉今之衛族皆中興祖

仁玉五代孫孔傳之後也仁玉字溫如子四宜憲冕勛勛字自牧宋雍

熙二年進士及第以殿中丞通判廣州累遷秘書

監祥符二年以太常博士知仙源縣事後以尚書

工部侍郎致仕卒贈吏部尚書生子五長道輔道輔字原

魯宋咸平元年賜進士出身為寧州軍事推官數

與州將爭事有此出天慶觀真武殿中一郡以為

神州將帥官屬往奠拜之欲上其事道輔徑前以

笏擊蛇碎其首祥符九年遷大理寺丞知仙源縣

主管廟祀再遷太常博士章獻太后臨朝召為左

正言未幾除右司諫龍圖閣待制奉使契丹歷知

青鄆徐許四州權御史中丞後出知泰州徙徐州

又徙兗州進龍圖閣直學士遷給事中在兗三年

復入為御史中丞為宰相張士遜所陷出知鄆州

行至韋城病卒仁宗思其忠特贈尚書工部侍郎

生子二長舜亮舜亮即宗亮宋嘉祐四年進士及第慶曆

五年知仙源縣事

生子名傳

傳一名若古字世文舜亮

之第三子精於易學宋元祐四年任仙源縣主簿

十八年改任仙源縣尉建炎四年同端友南渡率

族人拜疏闕下叙家門故事除知邠州改峽州又

知撫州累官中散大夫年七十五卒葬衢州府城

北孝弟望

生子端問端已端植端隱端位兄弟齊芳號為五龍

端問字子誠

官從政郎端口字子正官奉議郎年八十一卒贈

少保端植字子固嘗宰鄂之通城民至今思之終

通直郎端隱字子宣登紹興年進士文林郎江

陵府觀察推官歷官十載清慎自持卒於官子瑄

隨任以金侵難還卜葬於屬縣句容之福祚鄉因

家焉

萬曆四十一年會魁孔貞

也端位字子著

儒林郎常德府錄事叅軍宋高宗南渡之後當時

遂分爲南北宗宋人則祀孔子於衢州金人則祀

孔子於曲阜俱世襲封爵元時始廢衢封至我

朝混一天下既以上公之爵命襲於魯復以博士

之職命襲於衢

天札一頒增輝兩地褒崇之典誠卓越於千古矣

博士

孔彥繩五十九代弘治六年衢州府知府沈杰奏

請 詔授世襲翰林院五經博士奉衢州孔子
家廟祀事

孟氏姓譜

亞聖孟子帝嚳之後也帝嚳生后稷始教稼穡以
粒蒸民堯封之邰賜姓姬姬是爲姬姓之祖凡十六
傳至周文王當商之季三分天下有其二生子發
是爲武王遂克商而有天下武王封弟周公旦於
魯留輔王室其元子伯禽成王元年就封之國伯
禽生煬公煬公生魏公魏公獻公獻公生武公
武公生伯御伯御生孝公孝公生惠公惠公生桓
公桓公生子四長爲莊公其次庶子慶父叔牙季
友是爲三桓慶父之後初號仲孫其後更稱孟孫

示不敢伯仲莊公也故自以庶長為孟始以孟為
姓焉傳世至孟激字公宜娶仇氏生軻於周烈王
四年己酉四月初二日即魯共王五年在孔子沒
之後三十五年也是夕母夢神人乘雲板龍鳳自
泰山來將止於嶧母凝視久之忽見片雲墜而寤
時閭巷皆五色雲覆孟氏居焉娶田氏生子一享
年八十有四卒於周赧王二十六年壬申十一月
十五冬至之日鄒人因哭孟子而廢賀冬之禮遂
以成俗葬於鄒縣東北三十里四基山之陽

宗子世紀

二代孟仲子嘗從學於公孫丑

趙岐以為孟子之從昆弟未深考也

三代孟罍

四代孟寓

五代孟舒漢高祖九年為雲中太守

六代孟之後

七代孟昭博覽經史該貫古今仕漢為博士

八代孟但漢武帝時為太子門大夫

漢書作廣州人

九代孟卿漢武帝時為太傅

漢書作東海蘭陵人

十代孟喜字長卿父卿以禮經春秋煩雜乃使喜

從田王孫受易漢宣帝舉孝廉拜為郎遷曲臺

署長所著周易章句十卷

十一代孟鑑

十二代孟興仕漢爲尚書

十三代孟嘗字伯周少修操行仕郡爲戶曹史上
虞有寡婦至孝養姑如年老壽終夫女弟先懷
嫌忌乃誣婦厭苦供養加鳩其母列訟縣庭郡
不加尋察遂結竟其非嘗先知其枉狀備言之
於太守太守不爲理嘗哀泣門外因謝病去婦
竟冤死自是郡中連旱二年禱請無所獲太守
殷于到官訪問其故嘗請府具陳寡婦冤誣之

事因曰昔東海孝婦感天致旱于公一言甘澤
時降宜戮訟者以謝冤冤庶幽枉獲伸時雨可
期于從之卽刑訟女而祭婦墓天應澍雨穀稼
以登漢章帝時策孝廉舉茂才拜徐令州郡表
其能遷合浦太守年七十卒于家

後漢書曰會稽上虞人

十四代孟展字君誠

十五代孟軾漢桓帝時爲濟陰太守靈帝卽位進

太常熹平六年轉太尉

漢書作河南人

十六代孟敏字叔達客居太原荷甌墮地不顧而
去郭林宗見而問其意對曰甌已破矣視之何

益林宗以此異之因勸令遊學十年知名三公
俱辟並不屈

漢書作鉅鹿楊氏人

十七代孟光字孝裕漢靈帝末爲講部吏昭烈定
蜀拜爲議郎與許慈等並掌制度後主踐祚爲
符節令屯騎校尉長樂少府遷大司農延熙九
年秋大赦光於衆中貢大將軍費禕曰夫赦者
偏枯之物非明世所宜有也衰敝窮極必不得
已然後乃可權而行之耳今主上任賢百僚稱
職有何旦夕之危倒懸之急而數施非常之恩
以惠姦宄之惡乎竊謂法難以經久禕但頓謝

踧踏而已光之指擿痛瘡多如是類故執政重

臣心不能悅爵位不登年九十餘卒

蜀志作河南洛陽人

十八代孟康字公休魏明帝時爲散騎侍郎正始
中出爲弘農太守嘉平末徙渤海太守徵入爲
給事中散騎常侍遷中書令後轉爲監封廣陵

亭侯著漢書音義九卷

魏畧作安平人

十九代孟宗字恭武嘉禾中爲監池司馬遷吳令
奉母至孝母嗜筍冬節將至時筍尚未生宗入
竹林哀嘆而筍爲之出得以供母人皆謂至孝
之所感永寧中遷光祿勳御史大夫寶鼎三年

進為司空

吳錄作江夏人又吳書曰宗為豫章守民感其德生子皆以孟為字

二十代孟楫晉惠帝時為廬陵太守

二十一代孟觀字叔時晉惠帝時為殿中郎後為

黃門侍郎

晉書作勃海東平人

二十二代孟嘉字萬年娶大司馬陶侃第十女舉

秀才為安西大將軍庾翼府功曹再為江州別

駕巴丘令征西大將軍譙國桓溫參軍溫甚重

之奉使京師除尚書刪定郎不拜孝宗穆皇帝

聞其名賜見東堂辭以脚疾不任拜起詔使人

扶入年五十一終於家

陶淵明傳作武昌新陽人宗之曾孫與晉書同

二十三代孟懷玉居京口晉末孫恩叛宋高祖劉

裕伐之以懷玉為建武司馬功封鄱陽縣侯食

邑千戶高祖鎮京口懷玉為鎮軍參軍下邳太

守義熙三年出為寧朔將軍西陽太守又封陽

豐縣男食邑二百五十戶復為太尉咨議參軍

征虜將軍八年遷江州刺史十一年卒於官年

三十一追贈平南將軍

宋書云懷玉平昌安丘人

二十四代孟表字武達仕南齊為馬頭太守元魏

太和十八年歸魏孝文帝除輔國將軍南兗州

刺史領馬頭太守賜爵譙縣侯鎮渦陽封汝陽

縣開國伯食邑五百戶遷征虜將軍濟州刺史
為散騎常侍光祿大夫進號平平將軍世宗末

隆平東將軍齊州刺史延昌四年卒年八十一

贈安東將軍兗州刺史諡曰恭北齊作濟北蛇丘人

二十五代孟斌事元魏孝文帝為右丞

二十六代孟威字能重永平中為龍驤將軍出使

高昌還遷城門校尉直閣將軍進散騎常侍加

平北將軍光祿大夫復加撫軍將軍普泰中除

大鴻臚卿尋加驃騎大將軍左光祿大夫天平

三年卒贈使持節侍中本將軍都督冀瀛滄三

州諸軍事司空公冀州刺史魏書作河南洛陽人

二十七代孟恂

二十八代孟儒

二十九代孟景隋煬帝時為鷹揚郎將

三十代孟善誼隋文帝時為河內通守

三十一代孟詵唐高宗朝擢進士第累遷鳳閣舍

人武后時出為台州司馬遷春官侍郎相王召

為侍讀拜同州刺史神龍初致仕居伊陽山其

居為子平里開元初卒年九十三唐書作汝州梁人

三十二代孟大融唐玄宗時屢召不就隱玉屋山

三十三代孟浩然少好節義喜振人患難隱鹿門山年四十乃遊京師嘗於太學賦詩一座嘆服無有能抗張九齡王維雅稱道之維私邀入內署俄而唐玄宗至浩然匿床下維以實對帝喜曰朕聞其人而不見也何懼而匿詔浩然出帝問其詩浩然再拜自誦所為至不才明主棄之句帝曰卿自不求仕朕未嘗棄卿柰何誣我因放還開元末病疽背卒

唐書作襄州襄陽人

二十四代孟雲卿唐宗朝為校書郎

二十五代孟華唐德宗朝為檢校兵部郎中兼侍

御史

按三遷志以五郊為世系殊誤今依家譜及石刻正之

三十六代孟常謙唐德宗朝為義成軍中軍兵馬使憲宗加朝議大夫安州刺史仍加侍御史安州防遏兵馬使貶柳州司馬年六十卒柳子厚

誌其墓

按三遷志常謙誤作韋謙今正之

三十七代孟遵慶

三十八代孟瑄唐元和末屢薦不仕

三十九代孟方立唐僖宗朝為昭義節度留守

四十代孟承誨後晉少帝時為太府卿天福八年

嘗使契丹

四十一代孟漢卿後周世宗時爲左羽林大將軍
四十二代孟貫

四十三代孟昶

四十四代孟公齊少勵高行不樂仕進避亂東山
四十五代孟寧宗仁宗景祐四年孔道輔薦於朝
特授鄒縣主簿奉祀孟子其族稱之爲中興祖
生子二長堅次存

四十六代孟堅德學俱優特授徐州知州

四十七代孟寬

四十八代孟欽

四十九代孟津

五十代孟德義登進士第授魚臺縣令辭秩

五十一代孟允祖

五十二代孟惟恭字彥通弱冠能文不求官達遇
事有謀善斷暨主祀事能幹置於繼述之事尤

惓惓焉大定五年五月中書撥付祭田以頃計
者三十官錢以緡計者三千有奇收貯貫粒具
邊豆壘洗備春秋奠以其贏行貸計其子母所

入次第典創正殿塑亞聖像建兩廡作櫺星門
重三門構講堂西齋神庫房繚以周垣約百

餘丈築斷機堂于中庸書院之西北甃暴書臺
又刻加封亞聖制碑及宗枝圖林廟碑大小凡
三十餘焉至正九年卒年七十有六本縣令睦
孟誌其墓

五十三代孟之訓字曾甫元至正間任為單父教
諭秩滿陞莒州學正值兵興棄職歸家又避地
蔚州而卒

五十四代孟思諒洪武元年 詔授鄒縣主簿有
吏才朔正祀典修祠理墓多所幹濟

五十五代孟克仁字信夫以子希文授翰林院五
經博士天順三年十二月二十一日贈如其官

五十六代孟希文字十煥景泰三年 欽授孟子
後世襲翰林院五經博士主奉祀事生子二元

亨 天順二年希文同顏希惠入 朝時 上御
文華殿有 旨召入殿內親承顧問 上曰
恁幾時來希惠未喻其旨對曰臣從家裏來希
文上前對曰臣但遇 萬壽聖節便來 上指希
惠曰這到也老實又指希文曰你是孟子後還
有英氣在命賜晏畢復賞彩段二疋花銀一錠

五十七代孟元字長伯弘治二年襲生子公縻
五十八代孟公縻字先文因從弟公縻幼不克主

祀嘉靖二年代襲前職生子二長彥繼次彥緒
公縻字縻文嘉靖十二年襲前職生子彥璞

五十九代孟彥璞字朝璽隆慶元年襲前職萬曆二十六年六月初一日卒生子承光

六十代孟承光字永翹萬曆二十九年三月初一日襲前職

曲阜縣世職知縣一人

按史漢以前曲阜爲魯國故有從事督郵之官隋改爲曲阜縣以後則有令至宋以京朝官知縣事故有以殿中丞知縣事者有以光祿丞知縣事者真宗祥符二年改曲阜曰仙源仁宗皇祐三年詔今自仙源縣官復於孔氏子孫中選用徽宗崇寧間又詔文宣王後當聽一人注兗州仙源縣官故有丞有簿有尉大抵首世官也金天會七年改仙源仍爲曲阜金末及元時常以衍聖公兼知縣事故有世襲縣尹至

國朝洪武七年革世襲始改為世職俱聽衍聖公保舉族人之賢者咨部選授萬曆元年兩院題准挨取孔姓廩生六名學道考選四名送兩院兩院考選二名送吏部吏部考選一名除授前職舊係世職不與黜陟以不在應朝之例萬曆四年撫按題准如流官事例依期應朝聽候考察以後永為遵守蓋於厚聖裔之中又有飭吏治之意也

歷朝世職題名

漢

孔澍字君德十八代元帝永元間為魯從事

孔浮二十代延熹中任東魯督郵

孔綱二十代延熹中任東魯督郵

孔承二十代延熹中任東魯督郵

唐

孔緒四十代任曲阜縣令

孔昭儉四十一代累宰曲阜

後唐

孔仁玉字溫如四十三代任曲阜縣主簿兩考滿

陞縣令襲封文宣公後周廣順二年駕幸林廟

復授曲阜縣令兼監察御史

宋真宗祥符二年
改曲阜曰仙源

孔宜字不疑仁長子乾德四年詣闕上書述

其世家召見授曲阜縣主簿奉祀事

孔延世字茂先宜長子至道三年授曲阜縣主簿

秩滿陞福州閩人調汀州長葛真宗卽位呂

端奏召見改授曲阜縣令襲封文宣公

孔勗字自牧宣第四子雍熙二年進士及第祥

符二年以太常博士知仙源縣事

孔延魯四十五代祥符四年知仙源縣事主管祠

廟

孔道輔字原魯勗長子咸平元年賜進士出身祥

符九年以大理寺丞知仙源縣主管祠廟事

孔聖祐四十六代大中祥符元年同進士出身天

禧五年以光祿丞襲封文宣公知仙源縣事

孔宗亮卽舜亮道輔長子嘉祐四年進士及第慶

曆五年以匠作監丞知仙源縣事

孔彥輔字德甫四十五代慶曆八年任仙源縣主

簿秩滿除將作監主簿告養親十五年服闋知

仙源縣事

孔宗翰字周翰道輔次子登第嘉祐元年知

仙源縣事元祐初召爲司少卿遷鴻臚少卿

上言孔氏子孫世襲公爵領他官不在故郡

請自今襲封之人使終身在鄉里以奉祭祀詔

改衍聖公爲奉聖公不領他職給廟學田萬畝

賜國子監書立學宮以誨其子弟進刑部侍郎

孔宗壽四十六代治平四年任仙源縣主簿紹聖

元年知仙源縣事

孔若蒙字公明四十七代熙寧元年任仙源縣主

簿

孔若升字公漸四十七代元豐元年任仙源主簿

孔若古字世文後改名傳舜亮第三子元祐四年

任仙源縣主簿八年改任仙源縣尉建炎四年

扈從高宗南徙寓居衢州遂爲衢族之始祖

孔若谷字公應四十七代大觀二年任仙源縣丞

孔若哲字公智四十七代政和三年以從事郎就

差仙源縣丞

孔堯四十八代宣和五年以通直郎任仙源縣

丞終承議郎

孔端問字子誠傳長子宣和七年以迪功郎任仙

源縣丞

孔元用字俊卿五十一代寶慶元年以通直郎權

襲封衍聖公任仙源縣令

金天會七年改仙源仍為曲阜

孔若鑑字公謹四十七代天會八年以迪功郎任

曲阜縣主簿奏免賜田稅課

孔瑀四十九代皇統二年以登仕郎任曲阜縣

主簿

孔瓌四十九代皇統五年以將仕郎任曲阜縣

主簿

孔玖四十九代天德二年以忠勇校尉任曲阜

縣尉

孔思逮字進道五十四代世宗大定初入覲授承

事郎曲阜縣令

孔摠字元會五十大定三年襲封衍聖公管

勾祀事二十二年世宗召赴闕下特授兼曲阜

縣令

孔克昌字耆夫五十五代章宗承安二年任曲阜

縣令本年勅令衍聖公年及十七兼曲阜縣令

仍許世襲不得別行差占世襲曲阜令始此

元

孔元用前見太祖十五年木華黎平山東承制以故

宋縣令起授襲封衍聖公世襲曲阜縣令

孔之全字工升元用子乙酉年襲封衍聖公曲阜

縣令

孔治字世安之全長子中統元年以曲阜管民

長官改曲阜令四年權主祀事至元十三年授

承事郎曲阜尹兼管諸軍與魯仍權祀事

孔思誠字治道五十四代至元二十二年授從事

郎襲曲阜縣尹

孔濟字世美之全第三子延祐二年授承事郎

曲阜縣尹

孔思覬字恒道五十四代至治二年由國子生襲

曲阜縣尹

孔克欽字敬夫五十五代至元四年襲曲阜縣尹

孔希大字士功五十六代至正十二年以從仕郎

襲曲阜縣尹十八年改秘書郎辟中書省掾承

直郎翰林院都事調承德郎大郎正府都事

孔希章字士憲五十六代至正二十三年以從仕

郎襲曲阜縣尹

國朝

孔希大前見洪武元年以故元縣尹起改承事郎仍

授曲阜縣知縣七年坐罪廢世襲改世職

孔克伸字剛夫五十五代洪武七年衍聖公孔希

學同族人孔思矩等二十八人赴京保舉堪任

前職

太祖高皇帝召見命以蔣山為題須臾詩成

天顏大喜朗誦數遍笑曰莫說你別才調只這首

詩也該與你个知縣做遂領孔氏世職始此

孔克營字耕夫五十五代洪武十五年保任前職

領 勅赴任

孔希文字士周五十六代先任元教授洪武十七

年保任前職領 勅赴任

孔希範字士則五十六代洪武二十八年保任前

職領 勅赴任

孔克中字正夫五十五代永樂九年保任前職領

勅赴任宣德元年 勅封文林郎

孔公鏜字聲聞五十八代宣 九年保任前職

勅封承事郎

孔 謨字蘊伯五十七代景泰元年保任前職

勅封文林郎封父孔希武如其官

封父官始此

孔公錫字賜文五十八代由景泰庚午舉人天順

五年保任前職

勅封文林郎封父孔詮如其

官以考績加兗州府通判銜仍管縣事

世職加銜始此

孔燮字理伯五十八代成化八年保任前職

勅封文林郎封父孔希敬如其官加陞兗州府

通判銜仍理縣事

孔希永字士毅五十六代由監生成化二十三年

保任前職

孔彥士字朝臣五十九代由成化丁酉舉人弘治

二年保任前職

勅封文林郎封父孔公綬如

其官

孔承泗字永道六十六代正德元年保任前職

孔承夏字永功六十六代由監生正德五年保任前

職

孔公統字一文五十八代正德十一年保任前職

孔承震字永器六十六代由弘治戊午舉人嘉靖元

年保任前職

勅封文林郎

孔公珏字栗文五十八代由監生嘉靖十一年保

任前職

勅封文林郎

孔公澤字仁文五十八代嘉靖二十一年保任前職

孔承業字永基六十四代嘉靖二十五年保任前職
勅封文林郎封父孔彥學如其官

孔弘廊字以仕六十一代由歲貢嘉靖四十三年
保任前職以前聖公保塞以後兩院考選

孔承厚字永載六十四代由三氏學廩生隆慶三年
山東撫按薦舉孝行除授前職四年廣西道御

史趙可懷奏革世職理民事止許管林廟隨該
衍聖公奏林廟錢糧自有亦設管勾管理議裁

本官致仕以兗州府清軍同知劉岸駐劄曲阜
管理縣事

孔弘復字以誠六十一代由三氏學廩生萬曆元
年山東巡撫傅希摯巡按吳從憲酌議題請該
吏部尚書楊巍覆曲阜世職知縣乃國家優崇
先聖之典止當慎擇其人不當併棄其法乃以
弘復照題准新例考選除授前職同知仍回府
專管清軍四年奉例朝

覲世職應朝始此五年考滿陞濟寧州知州仍管縣事九
年考滿誥封奉直大夫贈父孔承英如其官

十四年考滿陞東昌府同知仍管縣事二十二年加銜山東都轉鹽運使司同知以禮致仕

孔貞教字

六十三代由四氏學廩生萬曆二

十二年照例考選除授前職二十四年以衍聖公奏兩院勘明二十八年奉

旨改南直常州府儒學教授秩滿三十三年陞京衛武學教授三十五年仍以本縣知縣職銜回籍

孔貞叢字茂所六十三代由四氏學廩生萬曆二

十七年照例考選除授前職三十一年考滿

勅封文林郎封父孔聞墅如其官二十四年陞沂州知州仍管縣事四十年加陞東昌府同知仍管縣事四十三年加陞山東都轉鹽運使司同知仍管縣事

孔聞簡字臨寰六十二代由四氏學廩生天啟

年照例考選除授前職

四氏學世職學錄一人

按學始於魏文帝黃初二年崇聖廟孔羨創建宋
真宗大中祥符二年殿中丞孔勗知縣事奏准令
就廟側建學以訓孔氏子孫猶未聞設官也乾興
元年孫宣公守兗請以楊光輔爲講書轉奉禮郎
楮宗元祐元年置教授一員於舉到文官內差或
委本路監司舉有行義人充人教訓本家子弟如
邳鄰願從學者聽四年尹復奏以文潞公薦爲教
授本年又設學錄一員此學錄官名之始也元世
祖中統三年詔立曲阜廟學以進士楊庸充廟學

聖門志 卷之三
教授又設正錄各一員仁宗延祐間益以顏孟二氏子孫受業

國朝洪武元年十二月奉

高皇帝聖旨孔顏孟三氏子孫俱係先聖先賢之後歷代崇重事同一體設三氏子孫教授一員學錄一員於師儒官內保陞其各生止入學習禮未有生員之名或有以儒士應試京闈者或有以儒士由兗州府學應試者宣德元年學錄始以聖裔任俱聽衍聖公同族眾公舉年德俱尊學問優長者咨部銓除正統九年衍聖公孔彥縉題准本

學諸生應山東鄉試成化元年衍聖公孔弘緒奏給三氏學印始名三氏學創開歲貢之例嘉靖十年山東撫按題准照州學例廩增各三十名萬曆十五年撫按題准添入曾氏子孫受業改鑄四氏學印學後正室五楹為衍聖應襲誦讀之所傍有配室待四氏博士應襲者也歷朝世職題名

前代

孔 塘字德純四十九代貞祐二年進士廟學正
孔之威字溫甫五十二代由單父教諭轉廟學正
終費鄒二縣尹

孔思永字常道五十四代任廟學正終河南省理
問東平路同知

孔克仁字志夫五十五代任廟學正

孔洵五十三代任廟學正升東平路儒學教授

孔摯字莘夫五十代終場及弟授廟學教授

孔汾五十三代由肥城教諭轉三氏子孫教授

孔思賁字完道五十四代任三氏子孫教授

孔希聖字上賢五十六代任三氏子孫教授

孔元順字存之五十一代任廟學正

國朝

孔克晏字堯夫五十五代由儒士宣德元年保任

三氏學錄景泰庚午欽取陪祀太學賜宮錦襲
衣後兼孔庭族長所著有巢愚藁行世

孔論字經伯五十七代由儒士景泰六年保任

三氏學錄

孔堯旻字舜夫五十五代由儒士天順八年保任

三氏學錄兼孔庭族長

孔克昫字東夫五十五代由儒士成化三年保任

三氏學錄兼孔庭族長

孔公璜字輔文五十八代由儒士成化十三年保

任三氏學錄修理祖廟瑩寢考正家門典故有
文集行於世

以前皆由衍聖公同族衆保舉任
以後皆由監生員照例考選任

孔公杰字佐文五十八代由監生正德十二年任
三氏學錄

孔公鉉字舉文五十八代由監生嘉靖十三年任
三氏學錄

孔彥衢字朝亨五十九代由監生嘉靖十九年任
三氏學錄

孔彥佩字朝鳴五十九代由監生嘉靖三十一年
任三氏學錄

孔承鎬字永周六十代由三氏學首貢嘉靖三十
九年任三氏學錄

孔承作字永則六十年代由二氏學首貢萬曆八年
任三氏學錄十五年山東巡按毛在題准改爲
四氏學錄入考察

本學考
察始此

孔承似六十年代由四氏學生員萬曆十七年任四
氏學錄

孔聞諫六十二代由四氏學首貢萬曆二十八年
九月授四氏學錄

尼山書院世職學一人

尼山在曲阜縣東南六里周靈王二十年聖母
顏氏禱於尼丘山升之谷草木之葉皆上起降之
谷草木之葉皆下垂二十一年孔子生大哉先
師苞乾坤之靈應貞元之運以為萬世教主也其
崇厥攸居時則有闕里之廟奠厥攸宗時則有泗
上之林而報本反始則尼山實為毓聖之區四方
瞻仰而宗依之蓋與天壤共敝矣五代後周太祖
顯德中魯守趙侯始於其地創廟以祀孔子宋仁
宗慶曆癸未四十六代襲封文宣公孔宗愿大建

廟宇元文宗至順三年五十四代襲封衍聖公孔
思晦請復尼山廟禮部尚書康里公巉白於中書
順宗至元二年左丞王公懋德議設尼山書院以
彭璠爲山長至正三年重建聖廟賜額尼山書院
立學舍祭田未及大完而彭璠卒以益都路馬猶
子爲山長後以五十四代孔思本爲山長陞盤陽
路學教授五十五代孔克信由泗水縣儒學教諭
陞尼山書院山長孔克綱由北直豐縣儒學教諭
陞尼山書院山長
國朝正德三年衍聖公間韶奏 准改山長職

銜爲學錄

世職題名

孔彥章字朝顯五十九代正德三年保任尼山書
院學錄

孔弘譽字以珍六十一代嘉靖三十一年保任尼
山書院學錄

洙泗書院世職學錄一人

書院在孔林之東二里許舊名先聖講堂泗水帶其北洙水經其南皇覽云諸弟子房舍并井瓮猶存周敬王三十六年孔子年六十八歲魯使人迎孔子孔子自衛返魯然魯終不能用孔子亦不求仕乃與弟子講道於洙泗之上刪詩書定禮樂繫周易於是洙泗遂爲萬世立教之首地矣魯記所載孔子講堂卽此漢光武東巡過魯坐孔子講堂是也元世祖至元戊寅曲阜縣世尹孔克欽因舊址創建請額爲洙泗書院以五十三代孔濱爲山

長奉侍香火其後五十四代孔思迅五十五代孔克昌五十六代孔希孟繼授洙泗書院山長惟克昌陞曲阜縣尹

國朝正德二年始改山長職銜爲學錄主奉祀事余考曲阜邑志唐有三十九代孔敏行元和元年狀元及第四十代孔緯孔纁孔振孔拯兄弟四人俱狀元及第四十一代孔昌庶乾寧四年狀元及第其登進士第與首冠賢書者未易枚舉照耀簡冊稱顯榮已乃

國朝止有五十八代孔公恂一人登景泰五年進士官少詹事邇來鹿鳴之歌少聞其響果氣運使然耶抑雉羔未具耶况洙泗當年爲

先師講道之所設廟祀設學錄

朝廷作興人文之鉅典也膺斯職者宜殫心宣力日與諸生共相砥礪庶聖人之後其更有興乎

世職題名

孔彥邃字朝元五十九代正德二年保任洙泗書院學錄

孔弘述字以傳六十一代嘉靖三十八年保任洙泗書院學錄

孔弘顥字以昂六十一代萬曆二十七年除授國子監學錄奉祀洙泗書院兼攝家庭 林廟舉

事學錄加京銜自此始

孔庭族長

宋徽宗崇寧二年詔文宣王家選親族一名判司簿尉事後即以家長繼之

四十九代

孔瓚字紀長以白身最長授廸功郎終朝請郎

知和州

孔瓌以白身最長授廸功郎

孔璞以白身最長授廸功郎

孔珉以白身最長授廸功郎

孔琬以白身最長宋孝宗乾道二年授廸功郎

誥曰使不胥為夷者夫子之賜也讀其書而不錄其苗裔可乎今襲封言爾最長有司如其故

事官之稱朕尊崇先聖之意

孔璋以白身最長授廸功郎奉南嶽祠

孔璞改名行以白身最長授廸功郎奉南嶽祠終

贈太子少傅

孔瑄以白身最長授廸功郎終從仕郎

五十代

孔撫以族長權奉祀事元武宗至大元年諭祭

遣學士王德淵初獻兗州知州馮禧亞獻家長

撫三獻

五十一代

孔元祇恩賜冠帶

孔元裕字益卿由恩州教授將仕郎濟陽主簿致

仕任族長

五十三代

孔涇字世清元興化路學正累翰林國史院檢

閱官我

太祖革命以賢良官隨例居臨濠衍聖公克堅奏

請釋還鄉為孔庭族長洪武十七年九月十五日

太祖召見應對稱 旨面賜藤拐一枝諭令主領

家務教訓子孫永遠遵守

涇因元末兵亂譜籍散失乃叅訂子史并

哀宋元故事編成譜籍藏於家盡
心於家門典故者世稱此公云

五十四代

孔思楷恩賜冠帶請修祖廟

孔思櫟同聖公世尹上表謝 恩修廟賜賚有加

五十五代

孔克晏字堯夫儒士兼三氏學錄

孔克昫字東夫儒士兼三氏學錄

孔克勳恩賜冠帶

孔克晟恩賜冠帶

五十六代

孔希晟恩賜冠帶

孔希琛兼林廟舉事

孔希迪恩賜冠帶

孔希瑄字士輝兼林廟舉事

孔希瑾恩賜冠帶

孔希瑒恩賜冠帶

五十七代

孔 諱字謹伯嘉靖十二年陪幸太學恩賜冠帶

孔 諾恩賜冠帶

孔 諱隆慶元年陪幸太學恩賜冠帶

五十八代

孔公寵恩賜冠帶

孔公寧恩賜冠帶

孔公舒恩賜冠帶

孔公源由林廟舉事轉家長

林廟舉事

前代未有至
佐家長督理林

國朝始設立以
廟繩愆子孫者

五十六代

孔希琛兼孔庭族長

孔希瑄兼孔庭族長

五十八代

孔公祿恩賜冠帶

孔公性恩賜冠帶

孔公源恩賜冠帶轉孔庭族長

六十代

孔承流恩賜冠帶

聖門志
卷之三十一
孔承茨恩賜冠帶

六十一代

孔弘顒字以昂兼洙泗書院學錄



